

# Orereta Abesbatzaren Txinako abentura

Imanol Elizasu Lasa

Santio biharamuna zen, Errenterian biharamun eguna izan ohi den hori. Iazkoan, 2010eko uztailaren 26an -ohi moduan- Madalena jaiak bukatuta, eguneroko zereginetara zuzenduko ziren errenteriarrek, baina egun horretan, munduaren beste puntan, Txinan, 13 eta 16 urte bitarteko 45 neska mutil errenteriarrek, herriko jaiak galdu arren, pozik ziren izugarritzko abentura burutu zutelako. Odiseo moduan, gazte errenteriar haiek hazi eta hezi egin ziren bidai hartan.

Hauxe duzue Errenteriako Andra Mari Abesbatzaren haur koroak, Orereta Abesbatzak Txinako Shaoxing hirian burutu zen *Word Choir Games*, 2010eko munduko abesbatzen olinpiadetan parte hartzearen kronika. Beraiekin joateko parada izan genuenok lehen eskutik kontatua;

Xenpelar parafraseatuz, "ele berria, Oreretakoek jarria".

Blagean, garai bateko bitakora kaier moduan, idatzi nuen uztailaren 16an: "Txinarako bidean gara, hau irakurtzen duzuenen Shangaira iritsi berriak izango gara, eta handik hartu autobusa eta errepidez hiru ordu luzeko bidaia egin ondoren Yangtze ibaiaren deltan kokatutako Shaoxing hiriraino iritsiko gara, hotelean sartu arropaz aldatu eta bihar, uztailaren 17ko goizeko 11:00etan, *Word Choir Games* 2010eko munduko abesbatzen olinpiadetan abestuko dugu lehen aldiz, haur koruei dagokion atalean".

Orduko argazkia ez zen gure *Abbey Road* partikularrean egindakoa, Andra Mari Abesbatzaren egoitzaatik -garai bateko "sindikaletik"- Toporen



geltokira daraman oinezko pasabidean egin genuena Txinara joan aurretik, hedabide eta herritarren aurrean erronkaren berri eman genuenean egindakoa baizik.

Eta, jakina, Erreteriatik Txinarako bidaia egiteko erabili genituen bitarteko geltokiak ez ziren Topoarenak izan, aireportuetakoak baizik. Uztailaren 15ean irten ginen Euskal Herritik eta egun bete beranduago iritsi ginen Shangaira. Han bero sargoria genuen zain. Berotzarra eta hezetasuna uztartuta, Shangain eta Shaoxing-en, ezin ahaztu hura Txina tropikala dela!

Shaoxing guretzat ezezaguna zen hiri hori ekialdeko Venezia gisa ezaguna da, duela 2.500 urte sortutako hiria da, lau milioi eta erdi gizon emakume –Euskal Herria eta erdi- hartzen dituena bere baitan. Eta 2010ean, bi urtean behin antolatzen diren *Word Choir Games*, munduko abesbatzen olinpiaden antolakuntza hartu zuen hiria. Nazioarteko txapelketa hau abesbatza ez profesionalei zuzendua da eta mundu mailan egiten den nagusia.

Orereta Abesbatzak 2010eko *Word Choir Games* lehiaketan zuzenean eta ate nagusitik sartzeko baldintzak bete zituen eta antolakuntzak

aukeratu gintuen, lehia beharrik gabe. Horretarako erabakigarria izan zen Andra Mari Abesbatzaren nerabeen koruak munduko lehiaketa homologatuen zirkuituan lortuak zituen emaitzak. Orereta abesbatzakook gure alde izan genituen 2004an Islandian burututako *Europa Cantat*, Haur eta Gazteentzako Nazioarteko Kantu Astean parte hartu izana, Kataluniako Cantonigros Lehiaketan lortutako sariak (2005 eta 2009 urteetan) eta 2007an Tolosako Nazioarte Abesbatzen Lehiaketan lortutako puntuazioak. Horretaz gain, munduko abesbatzen olinpiada horietan abestu ahal izateko, antolakuntzak Andra Mari Abesbatzaren nerabe koruaren kurrikuluma eta grabazioak aztertu zituen.

Arestian aipatu moduan, txapelketarako hamabi eta hamasei urte bitarteko berrogeita bost lagunez -42 neska eta hiru mutilez- osatu zen Orereta Abesbatzaren selekzio hau eta *Word Choir Games*-en txapeldunen lehiaketan parte hartu genuen hiru ataletan, haur taldeetan, eliz musikan eta folklore modalitateetan. Neroni -Imanol Elizasunaiz abesbatzaren zuzendaria, eta Andra Mari Abesbatzako beste 7 gizon emakumek batera egin genuen Txinarako bidaia, gure neska mutilei babesa eta laguntza emateko.



Zer eta noiz abestuko genuen? Bada. Lehen emanaldia, arestian kontatu dizuedan moduan iritsi berritan izan zen, uztailaren 17an eguerdi aldean. Haur kategorian abestu eta gero, egun berean ekin genion bigarren kantaldiari, folklore atalekoa berau, arratsaldeko 16:00etan. Eta Munduko Koruen Txapelketan azkeneko parte hartzea -musika sakroaren atalean- Erreterian Madalenak pil-pilean eta azken txanpan sartuta ziren uztailaren 25ean, Santiago egunean, egin genuen.

Beraz, iritsi berritan, ordutako bidaia egin ondoren, bi emanaldi izan genituen. Ez naiz ni futbol entrenatzailea, baina "entrenamenduaren" sekretutxo bat kontatuko dizuet: gure 45 koralista gazteei "isileko legea" ezarri genien bidaiari. Ez genituen mututu, ezin ere, baina bai gomen-dio -agindua- eman ordu luzetako bidaiari zehar mingaina ez gehiegi astintzeko, ahotsa beharko baitzuten ahal zen freskoena bere hoberena emateko Txinara iritsi berritan.

Bere hoberena emateko prest behar genituen. Eta esan behar dizuet ez nuela inongo zalantzarik horrela izango zela, bidaiariaren aurkezpen egunean, agerraldian, esan genuen moduan: *"munduko lehiaketa eskola izugarria izango da guretzat. Jakin badakit gure erantzukizuna handia dela baina aldi berean aukera paregabea da. Haurrak pozez beterik daude eta bere onena emateko prest"*.

Giro izugarria izan genuen Shaoxing hirian, ezta gutxiagorako ere, mundu osoko 472 abesbatza elkartu ginen han eta bi Erretereriakoak gainera, Landardabaso Abesbatza gurekin izan baitzen Munduko Abesbatzen Olinpiadetan. Estatu osotik bi abesbatza joan ginen, biak Euskal Herrikoak eta biak Erretereriakoak.

Pozik eta harro egoteko arrazoiak ditugu, inor baino gehiago neronek gazte talde honen buru naizen neurrian, 28 orduko bidaiariaren ondoren, 6-7 ordu lo egin (lo egin ahal izan zuenak...), eta estreinaldi egun horretan bi frogak akustiko eta bi lehiaketa burutu zituzten ... hango eguraldiarekin (Kristoren beroa...) eta taldeak oso ondo erantzun zuen, zoragarri! Nahiz arratsaldeko lehiaketan (Folklore atalean) nekea nabariagoa izan zen.

Ez zen izan beraz txantxetako iritsi berritan, han zegoen mailarekin, haur koroen atalean lehen

zilarrezko domina lortzea. Indonesiako Karasgturi Choir abesbatzak irabazi zuen atal horretan eta hori egin genuen bidaiariaren ondoren, oraindik iritsi berriak ginean, uztailaren 17ko goizean, egin genuen lehen emanaldia.

Egun bereko arratsaldean, folklore atalean lehiatu ginen, zilarrezko domina lortuz horretan ere. Arestian aipatu bezala, arratsalderako nabaria zen nekea gure 45 neska mutilen artean. Hala ere Orereta Abesbatzak bere hoberena eman zuen eta horra hor emaitza, gure bigarren zilarra. Indonesiako beste koro batek, Vocalista Angels izenekoak irabazi zuen urrea *Word Choir Games* atal honetan.

Kirolean parte hartzea omen da inportanteena, abesbatzen olinpiadetan, Shaoxing hirian ospatu zen abesbatza erakustaldi mundial horretan, hori horrela zen bene-benetan. Han abestea bera saria zen. Are gehiago gauzak bikain ateratzen direnean. Hirutik hiru, hiru ataletan parte hartu zuen Andra Mari Abesbatzaren haur koroak eta hiru ataletan zilarrezko domina lortu genuen.

2010eko Santio egunean abestu genuen azkeneko aldiz Shaoxing hirian, abesbatzen munduko lehiaketako eliz musika atalean, eta hor ere zilarrezko domina lortu genuen. Ez zen erraza izan, -honetan zein beste bi ataletan- maila oso handia zen. Eliz Musika atal honetan Txina bertako abesbatza batek irabazi zuen lehen saria, Hong Kong hiriko *Diocesan Schools Choral Society* abesbatzak, eliz musikarako abesbatza berau eta 88,75 puntu lortu zituen. Orereta Abesbatzak zilarra lortu du (73,88 puntu) eta gurekin batera izan ziren urre eta zilarreko sarietan Txina, Austria, Norvegia, Errusia eta Indonesiako abesbatzak.

Eta zer esan, Shangaiko Expon eta Shangaiko hirian Madalen egunaren bezperan



eman genituen emanaldiei buruz? Bada, hori ere hitz batekin laburtu daitekeela: IZUGARRIA. Izugarria Shangaiko Expo, izugarria guretzat Exporen baitan, Bilbo hiriaren pabilioian abestea, eta izugarria ondoren, Shangaiko Euskal Etxeak antolatuta hirian, Shaoxingo parkeko auditorioan, eman ahal izan genuen emanaldia. Ez dut hitzik hori kontatzeko. Bueno, bat bai: eskerrak. Eskerrak hori ahalbideratu zuten Expoko antolakuntzako lagunei, eskerrak Shangaiko Euskal Etxeari eta SPRIko lagunei. Eskerrak guztioi Andra Mari

Abesbatzaren koro gaztea den Orereta Abesbatza osatzen dugun guzion izenean.

Hau izan zen Orereta Abesbatzaren Txinako abentura. Eta Txinako lurralde horietan bizi izandakoa, ikusi eta ikasitakoa gure gazteentzat ahaztezina izan bazen, esan behar dizuet ahaztezina eta biziki hunkigarria gertatu zitzaigula, ondoren, Erreterian uztailearen 29an herritarrak, gurasook, lagunok, senideok eta Andra Mari Abesbatzak eskaini zeniguten ongi-etorria. Benetan mundiala!